

10/04/1997

Hubungan Malaysia, Bahrain lebih erat

MANAMA (Bahrain), Rabu - Datuk Seri Dr Mahathir Mohamad berkata, hubungan antara Bahrain dan Malaysia kini lebih erat setelah kedua-dua negara bersetuju untuk saling mengenali dan bantu-membantu dalam memajukan ekonomi.

Perdana Menteri berkata, beberapa keperluan sudah dikenal pasti untuk melicinkan perhubungan kedua-dua negara.

"Antara yang dibincangkan ialah mewujudkan perhubungan udara yang lebih baik, mengadakan rundingan dan hubungan antara pegawai kerajaan kedua-dua negara, penubuhan sebuah suruhanjaya dan pertemuan lebih kerap antara sektor swasta kedua-dua negara," katanya pada sidang akhbar di sini, lewat semalam.

Dr Mahathir adalah dalam rangka lawatan dua hari ke Bahrain. Lawatannya berakhir hari ini dan beliau akan berlepas ke Islamabad, Pakistan untuk lawatan sehari.

Menurutnya, beliau puas hati dengan mesyuarat dan rundingan yang diadakan dan yakin hubungan Bahrain-Malaysia akan menjadi lebih baik dan mesra hasil lawatan itu.

Beliau juga membayangkan kemungkinan Malaysia membuka konsulat di Bahrain jika ia dipersetujui oleh kerajaan Bahrain.

"Kita sedar akan pentingnya Bahrain di rantau ini dan kami mungkin membuka konsulat atau kedutaan Malaysia di Bahrain pada masa akan datang," katanya.

Menurut beliau, suruhanjaya perdagangan kedua-dua negara juga amat perlu supaya pegawai dapat selalu bertemu dan berbincang.

(END)